

SOMMAIRE DV PROCEZ,
pendant pardeuant Nosseigneurs du Grand
Conseil:

ENTRE M^e Charles Marchant, Prestre Chanoine
 & haut Doyen de l'Eglise Cathedrale de Lisieux,
 pourueu du Prieuré de Montbotin, & appellant
 d'une Sentence des Requestes du Palais de Rouën,
 demandeur en complainte.


CONTRE M^e Nicolas de Haly, Chanoine audit
 Lisieux, & intimé: Et contre Dom lean de Bortignieres
 aussi appellant.

IL y a deux choses à examiner en la question du possessoire du Prieuré de Montbotin: La premiere, de quelle nature est ce Benefice, & la seconde, quel de tous les pretendants iceluy en est Canoniquement pourueu.

De la premiere toutes les parties en sont demeurées d'accord: Sçavoir, qu'il est Regulier de l'Ordre de Cluny, de la collation du Prieur de Long-pont: Que le dernier titulaire le tenoit en Commande; & qu'ayant vacqué par mort, & le Collateur y ayant pourueu vn Seculier, contre la Regle, *Regularia regularibus, secularia, secularibus*, le droict d'y pouruoir est retourné au Pape.

Aussi toutes les parties pretendantes audit Prieuré sont obituaires & pourueus d'iceluy par la Sainteté. Il reste donc à examiner lequel d'iceux en est Canoniquement pourueu.

De ce Prieuré ledit Marchant en a esté pourueu par le Pape, le 14. Decembre 1649. comme vacant par la mort dudit Faucon, avec la Clausule & Decret, *Et quatenus dictus prioratus non secularis sed sancti Benedicti, vel alterius Ordinis regularis non tamen conuentualis existat, seu primo dicta capella non per seculares, sed per illius Ordinis regulares obtineri consuevit & quatenus prioratus, sed capella huiusmodi illum, seu illam in similem Commendam obtineret ultimus possessor assequatur seneatque, ita quod liceat de fructibus disponere, &c.*



Cette Clausule est celle dont se sert tousiours le Pape lors qu'il voit que l'impetrant doute si le Benefice qu'il demande est Seculier ou Regulier, & qu'il veut luy conferer de quelque qualite qu'il puisse estre, *Quatenus non secularis sed regularis existat*, laquelle n'est pas seulement de l'usage de Rome, mais tellement pratiquée en France, qu'il n'y a point de Banquiers expeditionnaires de Rome à Paris, qui n'en ayent expedie vne infinité de semblables, & qui n'en expedient tous les iours: Cinq des plus fameux desdits Banquiers en ont donné leur certificat par escrit, qui est au procez, portant que toutefois & quantes que le Banquier de France enuoye commission à son Correspondant de Rome, pour obtenir vne prouision d'un Prieuré, sans dire s'il est Seculier ou Regulier, ainsi que cela arriue souuent: Que c'est vne regle & vn usage de tout temps obseruez par les Expeditionnaires de Rome, d'exposer dans la premiere partie de la signature appellée la supplique, que le Prieuré est Seculier: Parce que la premiere & originelle qualite de tout benefice est Seculiere, & qu'ainsi on ne peut faillir en l'exposant: Mais d'autant qu'elle a changé de nature par la donation qui en a esté faite aux Reguliers, & qu'en ce cas pour en estre pourueu en Commande, il faut qu'il y ait expression dans la prouision de dispense de la regularité, dans le doute que les Expeditionnaires peuuent auoir si vn Benefice est Seculier ou Regulier: Ils ne manquent pas de faire obtenir la grace de quelque nature que soit le Benefice, ce qui s'employe dans les Clausules par cette expression ordinaire, pratiquée de tout temps, *Quatenus prioratus non secularis, sed regularis, &c.*

Et ne sert de dire que les Clausulles sont en la derniere partie de la signature, & apres le premier *concessum* ou *fiat*, de la premiere partie; parce que la seconde partie de la signature est signée d'un second *concessum* ou *fiat*, de mesme que la premiere: Et cela, ou par le Pape ou en sa presence par le Prefet de la signature & ces deux parties, la Supplique & les Clausules ne font qu'un mesme corps, lesquelles on ne scauroit separer sans destruire le corps; & d'autant plus que c'est dans les Clausules que le Pape regle les graces & explique la maniere en laquelle il entend qu'elles soient obtenues, en effet c'est où il met ses Decrets.

Cette verité n'est ignorée de qui que ce soit, pour peu qu'il ait de connoissance de ces matieres: mais elle est tres-manifeste en toutes les prouisions ou signatures qu'a obtenues ledit Marchant, qui sont au procez au nombre de huit, que ledit Marchant a esté obligé de faire expedier à cause des concurrences: Toutes lesquelles huit signatures sont expediees en la mesme forme, & avec la mesme clause & dispense, quoy que de diuerses dates, leuées en diuers temps, & expediees par diuers Prefets de signature en presence du Pape, à la derniere ligne de toutes lesquelles signatures le Conseil obseruera, s'il luy plaist, qu'en la reuision de la grace le Pape y a fait adiouster ce Decret: *Quatenus tamen ille, seu illa sic obtineri consueuerit ac illius ultimi possessor illum, seu illam in similem commendam obtineret*, d'où il est aisé

de iuger que la grace n'a point esté surprise, puisqu'elle a esté examinée autant de fois qu'elle a esté accordée, & qu'elle a esté accordée, à condition que le Benefice fust en Commande.

Il est donc vray de dire, que toutes les conditions apposées dans les signatures, ont les mesmes effets dans les Clausules, que si elles estoient aussi dans la premiere partie, appelée la Supplique, & notamment quand il s'agit de graces, que le Pape n'auroit point rejettées, quand elles auroient esté enoncées dans la premiere ligne de la Supplique: Or la grace qu'a obtenu ledit Marchant est de cette nature, que quand il l'auroit exprimée dans la Supplique, *difficiliorem non reddidisset gratiam*, & par conséquent point d'obreption; mais la grace est exprimée dans les Clausules, accordée par le Pape; signée, *Concessum in praesentia Domini nostri Papae*; Et cela avec condition & decret, & en la forme dont tous Expeditionnaires vsent, lors qu'ils sont en doute de la qualité du Benefice.

Car de dire que les Clausules ne sont pas partie de la signature; c'est vn erreur trop grossier, de dire encore qu'il n'y doit auoir aucune chose dans les Clausules, qui ne soient dans la Supplique: C'est vne opinion nouvelle & mal imaginée; car c'est dans les Clausules où sont mis tous decrets de translation de Commande nouvelle, ou de continuation de Commande, & les derogations à la regle de *infirmis*, qui est tenuë pour Loy en France, & se mettent dans la derniere partie ou Clausules avec le second, *fiat* ou *concessum*; & neantmoins ont le mesme effet que si elles estoient dans la premiere partie: Par certe seule raison que le Corps & les Clausules, & toutes les parties d'une signature, ne sont qu'une seule & mesme signature, fermée par la date & par le consens, qui est l'acte le plus essentiel, qui se met au dos de toutes signatures.

Certe clause donc, *quatenus dictus prioratus, &c.* par laquelle le Pape supplée à la premiere expression, estant vne declaration du Pape, que Marchant iouysse du Benefice contentieux, soit qu'il soit Seculier ou Regulier: Quelle raison de luy disputer ce Benefice, s'il en est le premier pourueu sans concurrence: Ce qui est clairement iustifié au procez? nulle à la verité; La premiere expression, que le Benefice est Seculier, qui est sa qualité d'origine, ne peut estre reputée vicieuse; & c'est tousiours par où il faut commencer la seconde expression dans les Clausules manifeste, & declare l'intention du Pape, *sive Secularis, sive Regularis existat*: Car de dire qu'il y a obreption, se feroit sans fondement, puis qu'on ne peut imputer d'obreption, *nisi quando falsa expressis aut non expressio reddidisset gratiam Papae difficiliorem*: Ce qui ne se rencontre pas en cette espece, puisque (comme dit est) le Pape a supplée l'expression dudit Marchant par vne Declaration essentielle, *Et quatenus dictus Prioratus non Secularis, sed sancti Benedicti vel alterius Ordinis Regularis, non tamen Conventualis existat seu prima dicta Capella, non per Seculares, sed per illius Ordinis Regulares obtineri consuevit, & quatenus Prioratus seu Capella huiusmodi illum, seu illam in similem commendam obtineret, &c.*

4

Au surplus il y a eu Arrest du Conseil en l'an 1642. au rapport de feu Monsieur de Montmagny, portant maintenue en la Chapelle ou Prieuré Doizisme, Diocese de Chartres, au profit de Maître Claude Mailly, Secrétaire de Monsieur le Cardinal de Bichy, qui auoit obtenu pareille Prouision en Cour de Rome que celle dudit Marchant, avec ladite clause & *quatenus dictus Prioratus, &c.* aussi quand en execution de l'Arrest du Conseil donné au rapport de Monsieur Choüart, les Banquiers de cette Ville de Paris ont esté ouys iusques au nombre de vingt-trois, ils se sont tous trouuez à la reserve d'un seul, de mesme aduis; que tel estoit l'usage de Cour de Rome, de donner la qualité de Seculier par la Supplique, & d'obtenir ladite clause, & *quatenus dictus Prioratus, &c.* & que telle Prouision n'estoit point obreptice, mais bonne & valable, au profit de ceux qui l'auoient obtenue: Ce seul Banquier qui a esté d'un sentiment contraire aux autres, a signé deux Consultations, vne escrite de sa main, & l'autre seulement signée avec quatre autres Banquiers, par lesquelles apres auoir exprimé la question en doute par les mesmes termes de la signature, Il concluë enfin en faueur de ce droit lesquelles deux Consultations sont produites au procez.

Reste d'examiner les pretendus droits desdits Haly & Bretinieres, qui sont aussi pourueus dudit Prieuré de Montbotin en Cour de Rome, par le deceds dudit Faucon; mais leurs premieres Prouisions sont du 4. Decembre 1649. & partant nulles par le concours qui se rencontre entre lesdits Haly & Bretinieres, & encores avec d'autres Prouisions que Guillaume d'Auge & Urbain Potier auoient aussi obtenues ledit iour 4. Decembre 1649. en Cour de Rome; toutes lesquelles Prouisions, *mutuo concursu sese impediunt*: Et à l'égard des autres Prouisions, que lesdits Haly & Bretinieres ont obtenues, elles sont toutes posterieures ausdites Prouisions dudit Marchant, qui sont du 14. Decembre 1649. Et par consequent, *Prior tempore potior iure.*

Et partant ledit Marchant espere de la Iustice du Conseil, qu'il mettra la Sentence des Requestes du Palais de Roüen, qui a maintenu ledit Haly au neant; en émendant & corrigeant, & faisant droit sur la complainte, que le Conseil maintiendra ledit Marchant en la possession & iouissance dudit Prieuré de Montbotin, avec restitution de fruiets, dommages & interets, & les despens mesmes reservez par l'Arrest de renuoy du Priué Conseil.

Monsieur DE BERNAGE, Rapporteur.

